

Saksbehandlar: Gitte Halvorsen

Kommunedirektør: Yngve Folven Bergesen

Dato: 21.04.2023  
Arkivsak-ID.: 23/1374  
JournalpostID: 23/7929

Saksnr.	Utval	Møtedato
004/23	Vilt- og fiskeutvalet	02.05.2023

## Kvotefri jakt på hjortekalv 2023 - søknad om dispensasjon frå § 18 i hjorteviltforskrifta

### Kommunedirektøren sitt framlegg til vedtak:

Vindafjord kommune vedtar å söke om løyve til å tildele kvotefri jakt på hjortekalv for jaktåret 2023/24 for alle hjorteaval i kommunen.

### Vilt- og fiskeutvalet 02.05.2023:

#### Behandling:

Geir Berge er for kvotefri avskyting av hjortekalv, men meiner det må knyttast opp mot historisk avskytingsprosent. Han la dette fram som framlegg til vedtak.

Geir Berge sitt framlegg til vedtak fekk 1 røyst.

Kommunedirektøren sitt framlegg til vedtak vart vedtatt med 4 røyster.

### VILT- 004/23 Vedtak:

Vindafjord kommune vedtar å söke om løyve til å tildele kvotefri jakt på hjortekalv for jaktåret 2023/24 for alle hjorteaval i kommunen.

#### Saksutgreiing

#### Bakgrunn for saka

Miljødirektoratet opna i 2022 for at kommunar med interesse- og arealbrukskonflikter knytt til tette hjortebestandar kunne söke Miljødirektoratet om løyve til å tildele kvotefri jakt på hjortekalv i tillegg til ordinær løyvetildeling (jf. brev av 15.06.2022).

Miljødirektoratet vidarefører nå denne ordninga også for jaktåret 2023/2024, jf. brev av 12.04.2023.

#### Saks- og faktaopplysningar

Kommunen har mottatt brev frå Miljødirektoratet om høve til å söke om kvotefri jakt på hjortekalv for jaktåret 2023/2024 (hausten 2023). I brevet dagsett 12.04.2023 står m.a.:

«Vi viser til vårt brev av 15. juni 2022 om kvotefri avskyting av hjortekalv.

Miljødirektoratet viderefører denne ordningen også for jaktåret 2023/2024.

Kommuner som opplever interesse- og arealbrukskonflikter knyttet til tette hjortebestander, kan også i år söke Miljødirektoratet om kvotefri avskyting av hjortekalv for jaktåret 2023/2024.

*Det er store hjortebestander i deler av landet, og i enkelte områder skaper dette betydelige interesse- og arealbrukskonflikter. Dette gjelder særlig blant aktivt næringsdrivende i landbruket langs kysten. For å begrense konflikten ønsker Landbruks- og Matdepartementet (LMD) å se på muligheter for et økt uttak av hjort også for jaktåret 2023/2024, og har bedt Miljødirektoratet legge til rette for dette. En videreføring av ordningen med fri avskyting av hjortekalv ble godt mottatt av næringsorganisasjonene og erfaringene fra siste jaktsesong er bra. En oppsummering av resultatene fra 2022 vil imidlertid ikke foreligge før seinere i 2023.»*

Fristen for å søke om løyve til å tildele kvotefri jakt på hjortekalv for jaktåret 2023/2024 er 15.mai 2023. Søknaden skal inneholde vurdering av kommunens særskilte behov for kvotefri jakt. Søknaden blir handsama av Miljødirektoratet etter føresegna om dispensasjon i forskrift om forvaltning av hjortevilt § 37.

*«Kommunen tildeler fellingstillatelser gjennom Hjorteviltregisteret som normalt innen 15. juni. Selv om eventuell tildeling av kvotefri jakt på hjortekalv kommer i tillegg til den normale fellingstillatelsen, skal også dette tildeles innen fristen 15. juni. Kommunen må selv utforme tillatelse til kvotefri jakt på hjortekalv og informere valdene som får tildelt dette innen jaktstart 1. september.»*

*«Kommunen kan vurdere om det er hensiktsmessig at kvotefri jakt på hjortekalv fortrinnsvis tildeles til vald med bestandsplan, eller gis til vald i deler av kommunen der særskilte behov foreligger. Som annen jakt på hjortevilt, skal kvotefri jakt på hjortkalv skje innenfor godkjente vald og i tråd med regler for utøvelse av jakt, jf. forskrift om utøvelse av jakt, felling og fangst med kommentarer. Adgang til kvotefri jakt på hjortekalv gjelder for alle jaktrettshavere i de vald som omfattes av ordningen.»*

#### Bestandsutviklinga i Vindafjord – mål, tiltak, historikk

Fastsetting av minsteareal er det viktigaste verkemiddelet i reguleringa av bestandsstørleik. Andre verkemiddel er fråvik frå minstearealet og bestandsplanlegging. Kommunen kan ved tildeling av løyve fråvike minstearealet med inntil 50% opp eller ned. Fråviket kan gjerast på bakgrunn av ulike levekår for hjort i kommunen, bestanden sin storleik og utvikling, den skade viltet forårsaker eller andre ekstraordinære forhold, (jf. Forskrift om forvaltning av hjortevilt, § 7).

Alt i 2004 vedtok Vindafjord kommune overordna mål for hjorteforvaltninga som i praksis innebar ei stabilisering eller reduksjon av hjortebestanden:

- Bestanden av hjort skal stabiliserast innanfor eit nivå som til ei kvar tid vurderast som berekraftig, både i høve til bestanden sin kvalitet og i høve til verksemda i andre samfunnssektorar.
- Hjortebestanden skal ikkje representere ein trussel mot det biologiske mangfaldet i kommunen. Etter komunesamanslåinga vart desse måla formelt vedtatt for «nye» Vindafjord kommune i 2008.

Det interkommunale hjorteviltutvalet, eit samarbeidsorgan for forvaltning av hjortevilt for medlemskommunane Sauda, Suldal, Etne, Vindafjord, Tysvær, Bokn, Karmøy, Haugesund og Sveio, vedtok i 2013 «Hjorteviltplan for Det interkommunale Hjorteviltutvalet 2013 – 2015», med overordna, kortsiktige og langsiktige mål for hjorteviltforvaltninga i regionen.

Med bakgrunn i Hjorteviltutvalet sin plan og tidlegare vedtatte mål vedtok Vindafjord kommune så i 2014 følgjande overordna mål som forvaltningsmål for hjort i Vindafjord:

- Bestandane av hjort skal stabiliserast innanfor eit nivå som til ein kvar tid vert vurdert som berekraftig av kommunen, både i høve til bestandens kvalitet og i høve til verksemda i andre samfunnssektorar
- Hjortebestandane skal ha ein biologisk forsvarleg kjønns- og aldersstruktur og oppretthalde sin

## genetiske variasjon

- Hjortebestandane skal ikkje representera ein trussel mot anna biologisk mangfald
- Hjortebestandane skal gi mest mogeleg stabil avkastning som grunnlag for ein sunn økonomisk og rekreasjonsmessig utnytting
- Regionen har som overordna mål at ein ønskjer større dyr i framtida (økt kroppsvekt/slaktevekt)
- Regionen har og som mål å redusere skadeomfanget knytt til skog og jord og ha færre trafikkdrepne hjort.

I tillegg vedtok kommunen å slutte seg til dei overordna, langsiktige og kortsiktige måla i Hjorteviltutvalet sin plan. Måla om auka kropps-/slaktevekter, redusert skadeomfang i skog- og jordbruk og tal trafikkdrepne hjort innebar å oppretthalde eit høgt uttak for å redusere bestanden.

Etter oppdrag frå Hjorteviltutvalet gjorde Norsk Hjortesenter i 2018 ei evaluering i forhold til måloppnåing av 4 utvalde delmål frå planen av 2013:

- Auke gjennomsnittsalderen til dei vaksne dyra i bestanden
- Forbetre kjønnssbalansen i bestanden
- Auka slaktevekt på kalvar og ungdyr
- Auka produktivitet i bestanden

Som bakgrunn for Norsk Hjortesenter si vurdering av bestandsutviklinga i forhold til desse utvalde måla vart nytta nyaste tilgjengelege data, m.a. Sett hjort, fellingsstatistikk og statistikk over trafikkdrepne dyr. Vurderingane, med råd om korleis bestanden i regionen bør forvaltast dei fyrtre 5 åra for å nå desse delmåla, vart presenterte i dokumentet «Forvaltningsmål for hjorten på Rogaland 2018-2023», vedtatt av Det interkommunale hjorteviltutvalet i 2018.

I følgje måldokumentet bør det årlege jaktuttaket ha ei slik fordeling (pkt. 9:2):


- Minimum 35% kalv av samla uttak
- Maksimum 15% eldre hanndyr
- Maksimum 15% spissbukk
- Minimum 35% hodyr 1,5 år og eldre

Dokumentet rår til å halde avskytingsprofilen lik og at meir lokale tilpassingar vert gjort gjennom totaluttaket.

I 2019 vedtok Vindafjord kommune vidareføring av dei overordna måla frå 2014 som forvaltningsmål for hjort i Vindafjord, og gjekk samtidig inn for å nytte dokumentet frå Norsk Hjortesenter som styringsverktøy for forvaltninga av hjort i Vindafjord.

I 2004 vart minstearealet for hjort samordna mellom Ølen og Vindafjord kommunar og fastsett til 600 dekar, noko som innebar ein reduksjon av minstearealet i begge kommunane. Dette minstearealet vart vidareført for «nye» Vindafjord kommune ved ny forskrift i 2006. Grunna likt minsteareal over heile kommunen og ujamn hjortetettleik, har i tillegg fråvik frå minstearealet vore mykje nytta som verkemiddel i kommunen for å avhjelpe situasjonen i områda med størst utfordringar.

Gjennom 2000-talet arbeidde kommunen for å få kontroll på bestandsveksten. Etter ein topp i tal felte dyr i 2006-2009 (2007: 817 felte dyr) starta både tal felte dyr og tal observerte dyr på vårteljingane å synke/flate ut. Nokre harde vintrar tidleg på 2010-talet medførte store utfordringar for hjorteviltet. I staden for å oppretthalde eit høgt uttak i kommunen vart tal tildelte løyve redusert, då det vart mindre behov for fråvik frå minstearealet i delar av kommunen. Sidan 2015 har vintrane vore milde og bestanden auka. Frå 2019 vart minstearealet redusert til 500 dekar og høgt uttak av kalv og hodyr vart vektlagt, samt overvekt av hodyr i uttaket. Tal fellingsløyve og tal felte dyr er no høgare enn nokon gong, jf. figur 1.



Figur 1: Tildelte og felte hjort i Vindafjord 2008-2022. Raud strek: løyve. Blå strek: felte dyr.

#### Resultat fra jakta høsten 2022

Vindafjord kommune v/vilt- og fiskeutvalet vedtok 01.08.2022 (VILT-033/22) einstemmig å søke om løyve til å tildele kvotefri avskyting av hjortekalv for jaktaret 2022/2023 for heile kommunen. Miljødirektoratet godkjente søknaden i brev av 09.08.2022. Eitt vald (vald 3 Valåsen) ønskte ikkje å vere med på ordninga.

Både vald med og utan bestandsplan nytta seg av ordninga. Av valda utan bestandsplan felte 19 vald til saman 35 frie kalvar. Desse valda ligg fordelt i heile kommunen. For vald med bestandsplan er tal kalvar felte på ordninga ikkje like tydeleg, men for fleire av desse valda bidro ordninga til å auke kalvedelen i uttaket og den totale fellingsprosenten.

Vindafjord tildelte 1200 ordinære løyve for hjort for hausten 2022. Det vart felt 1126 dyr (93,8%) fordelt slik:

388 (34,5%) kalvar, 172 (15,3%) spissbukk, 205 (18,2%) ungkolle, 164 (14,6%) eldre bukk og 197 (17,5%) eldre kolle.

Dette resultatet er svært nær den tilrådde fordelinga i måldokumentet som kommunen følger.

Tilsvarande tal for 2021 var 1052 felte dyr av 1176 løyve (89,5%), med slik fordeling: 323 (30,7%) kalvar, 176 (16,7%) spissbukk, 224 (21,3%) ungkolle, 142 (13,5%) eldre bukk og 187 (17,8%) eldre kolle.

Det kan sjå ut til at ordninga med kvotefri jakt på hjortekalv under jakta 2022 har bidratt både til auka fellingsprosent og til betre måloppnåing for fordelinga av felte hjort i Vindafjord i 2022.

#### Innspel

I e-post av 18.04.2023 spør Tore Skogen, leiar av NJFF Rogaland og Vindafjord Jakt og Fiskelag, om kommunen ser føre seg å sende søknad til Miljødirektoratet om kvotefri jakt på hjortekalv også for hausten 2023. Vidare skriv han: «*NJFF Rogaland og Vindafjord Jakt og Fiskelag stiller seg positiv til ordningen.*»

## **Vurdering**

Forvaltning av hjort kan vere utfordrande ettersom tal for reell bestandsstorleik, kjønns- og aldersfordeling ikkje er tilgjengelege og alle vurderingar og avgjerder må takast på grunnlag av historiske tal og data og lokalkunnskap. Ein må og vere førebudd på lite føreseielege svingningar mellom år og endring i arealbruk, som kan krevje tilpassing av planar og verkemiddel for å nå måla.

Sidan starten av 2000-talet har kommunen nytta dei tilgjengelege verktøya gitt i lovverket for å redusere skadar på jord- og skogbruk og tal påkjørslar. Minstearealet har vore sett ned ved fleire høve, samtidig som fråvik frå minstearealet har vore nytta i stor grad. I 2022 har meir enn halvparten av valda (36 av 68 vald) godkjent fråvik frå minstearealet, m.a. på grunn av stor hjortetettleik med mykje skadar på både jordbruk og skogbruk og trafikkpåkjørslar. Frå 2019 er og uttaket av kalv og koller veklagt sterkare, og hodyrdelen i uttaket har vore over 50% i kommunen, for raskare å nå kommunen sine mål for bestandsutviklinga.

For jakta hausten 2022 tildelte kommunen 1200 løyve på hjort. Av desse var 735 løyve forvalta med bestandsplanar. Til valda utan bestandsplanar tildeler kommunen opp mot 35% kalv, i samsvar med måldokumentet. Bestandsplanane har noko lågare uttak av kalv, slik at delen kalv av tildelte løyve utgjer nær 28% i kommunen.

Etter tiltaka i 2019 og omlegging til høgare uttak av kalv og hodyr, samt overvekt av hodyr i uttaket, har kalvedelen av tal felte dyr auka i kommunen frå 27% i 2019 til 30,7% i 2021. Med kvotefri jakt på hjortekalv i 2022 auka kalvedelen i uttaket til 34,5%. Vidare ligg fordelinga på kjønn og alder i uttaket elles svært nær den tilrådde fordelinga i måldokumentet som kommunen følger. Det er grunn for å tro at ordinga med kvotefri jakt på hjortekalv under jakta 2022 har bidratt både til auka fellingsprosent og til betre måloppnåing for fordelinga av felte hjort i Vindafjord i 2022.

Skogbrukslova, § 6, pålegg skogeigar å forynge på nytt etter hogst av bartre. Skadar av hjort i plantefelt av gran er ei stor utfordring i mange område i kommunen. Dette året har kommunen t.d. fått søknad frå 2 vald i Ølmedal og Imsland om tildeling av fleire løyve enn kommunen har høve til etter hjorteviltforskrifta, § 7, på grunn av skadar av hjort på forynging. Planting og supplering etter skade er kostbart for skogeigar og gir ikkje optimal utnytting av offentlege tilskot. Der beiting av hjortevilt fører til vesentlege skadar på skog som er under forynging, eller er ei vesentleg hindring for å overhalde plikta til å forynge etter skogbrukslova §6, pålegg skoglova kommunen som viltorgan å vurdere om det er behov for å regulere bestanden av hjortevilt slik at beitetrykket vert redusert.

Tettleiken av hjort varierer i kommunen, og innan valda. Aktivt drivne jordbruksareal er meir attraktive for hjorten enn areal i mindre aktiv bruk. Den økonomiske belastninga av skadebeiting vert dermed ujamnt fordelt på eigedommane. Kvotefri avskyting av hjortekalv hausten 2022 kan vere eit godt ekstra verktøy for å avhjelpe skadesituasjonen på jord- og skogbruk i valda med størst utfordringar og dempe interessekonfliktane internt i valda.

Uttak i kategorien kalv er til vanleg fordelt ganske jamt mellom kjønna. Kvotefri jakt på hjortekalv kan gjennomførast utan at dette får uheldige konsekvensar for kjønnsfordelinga i bestanden. Ein får og høve til å ta ut morlause kalvar eller kalvar med därleg kondisjon før vinteren.

## **Kommunedirektøren sin konklusjon**

Med bakgrunn i saksutgreiinga rår kommunedirektøren til at Vindafjord kommune søker om løyve til tildeling av kvotefri jakt på hjortekalv for jaktåret 2023/24 for alle hjortevald i kommunen.

## **Aktuelle lover, forskrifter, avtalar m.m.**

Forskrift om forvaltning av hjortevilt (2016)

